

Otklanjanje organa na živo – najnoviji biznis Komunističke partije Kine

Nakon što je jedan kineski novinar i insajder 9. marta 2006. otkrio prve činjenice o postojanju koncentracionog logora u okviru jedne bolnice u gradu Sujiatunu kod Shenyanga, glavnog grada kineske provincije Liaoning, gdje su hiljadama praktikanata Falun Gong godinama oduzimani organi da bi oni zatim bili ubijeni, a posmrtni ostaci spaljeni, u javnosti se pojavilo niz dokaza da se ovaj nezamislivi zločin zaista dešava i to ne samo u jednoj bolnici, već u bolnicama širom Kine. Nezavisan izvještaj iz Kanade procjenjuje da su desetine hiljada zatočenih praktikanata Falun Gong u Kini bile žrtve operacija otklanjanja organa "na živo".

Svjedokinja potvrdila postojanje logora

Supruga jednog hirurga iz bolnice Sujiatun, koja je i sama radila u toj bolnici, potvrdila je u intervjuu listu Epoch Times da je u okviru te bolnice bilo zatočeno preko 6000 praktikanata Falun Gong i izjavila da joj je njen (bivši) muž priznao da je lično izvršio preko 2000 operacija otklanjanja rožnjače od praktikanata Falun Gong, a da su nakon njega drugi hirurzi otklanjali druge organe. Praktikanti kojima su otklanjani organi su još bili živi, a nakon što bi im bili otklonjeni organi, njihova tijela bi bila spaljena.



Suprug joj je rekao da su zatočnici u koncentracionom logoru Sujiatun svi bili Falun Gong praktikanti i da za druge, čak i za osuđenike na smrt, otklanjanje organa nije moglo biti urađeno bez potrebnih papira i procedure. Samo za Falun Gong praktikanata, zbog centralne politike Komunističke partije da se smrt praktikanata "smatra samoubistvom", bolnica je mogla pritvarati praktikante i živima im otklanjati organe bez ikakvih procedura. Svaki hirurg je znao da su oni Falun Gong praktikanti. Njima je rečeno da činiti tako nešto praktikantima nije zločin, već da oni "čiste" za komunističku partiju.

Priznanja bolnica u Kini da koriste organe praktikanata

Kineske bolnice nude organe za transplantaciju u roku od dvije do tri sedmice. To je moguće jer bolnice raspoložu organima desetina hiljada zatočenih Falun Gong praktikanata, što dokazuje snimljen razgovor sa jednom kineskom bolnicom:

N: "Je li to direktor Song?" Song: "Da, izvolite." N: "Njen ljekar joj je rekao da je bubreg prilično dobar jer on [donator] prakticira Falun Gong." Song: "Naravno. Svi koje mi imamo dišu i srce im kuca... Do sada, ove godine, imamo više od deset bubrega, više od deset takvih bubrega." N: "Više od deset bubrega takve vrste? Mislite, živa tijela?" Song: "Da, tako je."

Nezavisan izvještaj iz Kanade potvrdio navode o otklanjanju organa

6. jula 2006. u Kanadi je objavljen izvještaj, koji je bio rezultat višemjesečnih istraživanja, a čiji su autori bivši kanadski državni sekretar za Aziju i Pacifik, David Kilgour i kanadski advokat za ljudska prava David Matas. Autori izvještaja su došli do zaključka da su tvrdnje o otklanjanju organa praktikantima Falun Gong u Kini istinite.



G. Kilgour je izjavio: "Ne mislim da itko može imati ikakvih sumnji da se ova nevjerojatna praksa nastavlja... Oni vam uzimaju oba bubrega, zatim srce, kožu, rožnjaču i jetru, a vaše tijelo je onda bačeno u peć za spaljivanje smeća."

Izvještaj konkretno identificira kao počinitelje "kinesku vladu i njene službe u brojnim dijelovima Kine, osobito u bolnicama, ali također i pritvornim centrima i 'narodnim sudovima'."

"Ove tvrdnje su tako šokirajuće da je skoro nevjerojatno povjerovati u njih", stoji u izvještaju. "[One] predstavljaju groteskan oblik zla, koje bi, uprkos svim izopačenostima koje je svijet dosad vidio, bilo nešto neviđeno na ovoj planeti. Ovaj strašan horor čini da se kolebamo u nevjerici. Međutim ta nevjerica ne znači da su ove tvrdnje netačne."

Nakon objavljivanja izvještaja, David Kilgour i David Matas obišli su više od 20 zemalja, održavajući konferencije za štampu kako bi zakonodavcima, vladama, medijima i javnosti skrenuli pažnju na, kako su to nazvali, - "novu vrstu zla na ovoj planeti". Između ostalog, posjetili su i Evropski parlament u Briselu i Vijeće za ljudska prava Ujedinjenih Naroda u Ženevi, a 29. septembra 2006. je i podkomitet američkog kongresa održao saslušanje u kojem su David Matas i David Kilgour dali svoje izjave.

Evropski parlament osudio mučenje i zatvaranje praktikanata Falun Gong i izrazio zabrinutost zbog izvještaja o otklanjanju organa Falun Gong praktikantima

U rezoluciji o odnosima između EU i Kine od 7. septembra 2006., evropski parlament je snažno osudio zatvaranje i mučenje praktikanata Falun Gong u zatvorima i radnim logorima i izrazio zabrinutost zbog izvještaja da se organi praktikanata Falun Gong otklanjaju i prodaju bolnicama. Dalje, Evropski parlament traži od Kineske vlade da prestane zatvarati i mučiti praktikante Falun Gong i da ih odmah pusti na slobodu.

Više informacija: http://faluninfo.ba/otklanjanje_organ